

vnd auch die seins gleichen sind,  
 Gott helff jm fort,  
 vnd stercke in durch Christus wort.

Wir bitten Gott zu aller zeit,  
 daß er erhalte disen streit,  
 durch seine mittel füre auß,  
 zu ehren Gott vnd seiner braut,  
 die er erwarb,  
 do Christus fur vnser sunde starb.

Wolauff du edel Kriegsman,  
 es gehet itzund all arme an,  
 wider disen bösen widerchrist,  
 am tag ist seine falsche list,  
 nu ist es zeit,  
 wider in zu füren rechten streit.

Wer könt nu nicht frölich sein,  
 wir haben vor uns hülffe schein,  
 denn vnser sache die ist klar,  
 wir streiten fur des Herrn schar  
 der Christenheit,  
 die itzund noch in sorgen steht.

Wir wollen Flug zu streite gan,  
 gerüst vor vnser Feinden stan,  
 vnd schlagen drein mit Gottes macht,  
 Sie müssen fur vns auff die jagt,  
 mit vns ist Gott,  
 mit in ist eitel spot.

Darumb wil Gott sie straffen recht,  
 vor ihn erhalten seine knecht,  
 den er zur rach in erhalt,  
 vor ire bosheit mannigfalt,  
 dem herrn sey ehr,  
 vor seinen segen jmer mehr,

Das sprichwort hat hin sein beschyt,  
 dauon gesungen ist dis lidt,  
 Gott wol vns gönnen allen preis,  
 daß wir zun eren werden weis,  
 der sunden quidt,  
 daß helff vns got zu aller zeit,